

103/  
DE HISTORIAE NATURALIS STUDIO  
CONTROVERSIAE,

FRAGMENTA,

QUAE

VENIA AMPLISS. FAC PHILOSOPH. UPS.

PRAESIDE

ELIA FRIES

OEC. PRACT. PROE. ORDIN. REG. ET BORGSTR.

PRO GRADU PHILOSOPHICO

P. P.

CAROLUS FREDRICUS SJÖSTRÖM

Gestr. Hels.

IN AUDIT. GUSTAV. D. XIX MARTII MDCCXXXVI.

H. A. M. S.

UPSALIAE,

EXCUDEBANT REGIÆ ACAD. TYPOGRAPHI.

c1B=54.1358

F-94

CHUTZ: STILLENTAN EAGLES IN  
THE MOUNTAINS

BY RICHARD L. DAWSON

1949

THE UNIVERSITY OF TORONTO LIBRARIES

COLLECTOR'S EDITION

THE UNIVERSITY OF TORONTO LIBRARIES

STILLENTAN EAGLES IN THE MOUNTAINS

BY RICHARD L. DAWSON

1949

THE UNIVERSITY OF TORONTO LIBRARIES

STILLENTAN EAGLES IN THE MOUNTAINS

BY RICHARD L. DAWSON

STILLENTAN EAGLES IN THE MOUNTAINS

STILLENTAN EAGLES IN THE MOUNTAINS

STILLENTAN EAGLES IN THE MOUNTAINS

ADDRESSE: 8777 CIBAO

R<sup>2</sup>: 33.946

11-12-07

BOKHÅLLAREN

HÖGÄDLE

**HERR PEHR STRÖMBECK**

OCH HÖGÄDLA

**FRU CATHR. ELIS. STRÖMBECK**

FÖDD KJELLDALH,

tillegnas dessa blad

såsom ett offer af tacksamhet och tillgifvenhet

af

KARL FREDRIK SJÖSTRÖM.

c13

REDACTIO

LIBER

ADIEGMENTO DILECTO VENITI

ALLEGATO LIBRO

ADIEGMENTO DILECTO VENITI

INAGGIUNTO DOCUMENTO

Corrigenda:

- p. 1. lin. 6 a fine *capiat* pro *capitat*.
- p. 6. lin. 6 a fine *antithesi*
- p. 7. lin. 4 *nosse* pro *posse*.
- p. 13. lin. 3 a fine *fallere* pro *falere*.
- p. 14. lin. 6 a fine *privi* pro *privae*.

---

## DE HISTORIAE NATURALIS STUDIO CONTROVERSIAE.

---

### §. 1.

Cum naturae a priori, ut ajunt, constructioni ab altera parte, ab altera empirico studio major tribuatur dignitas, saepe quae<sup>ri</sup>itur, quae vera aut media ratio? cui primarius locus est concedendus? Omnes hanc materiem spectantes rationes ita ab acutissimis ingeniosis antiquitus sunt expugnatae, ut nulla spes nobis supersit, aliquid novi addendi; notissima et jam trivialia repetere taedet. Cum vero res, quae sequentur, cum eadem intime sint connexae, nostram profiteri liceat sententiam. Ex ea commenta, quae de singularum disciplinarum majori vi et dignitate vulgo soventur et sparguntur, parum justa et apta sunt; omne scire in scientiarum comitiis aequum pollet. Ad eandem metam sunt diversae viae, in ingenio humano aequum fundatae, ad opus perficiendum aequum praefiscini necessariae. Tantum igitur abest, ut sibi invicem inimicae sint, ut potius altera eo perfectior, quo magis servato suo cognoscendi principio ad alteram accedat. Quis negaverit philosophicum naturae studium, disjecta membra ordinans et scientiae hiatus indigitans, multum ad ejus perfectionem contulisse idemque scriptores invenisse, quorum cogitandi acumen dicendique elegantia plurimos capit. Quis porro miretur empiricum studium, theoriarum ornamento et regimine privatum, a nesciis harum lapidis lydii minus aestumari. Nam in profani vulgi iudicio is praecipuus mihi videtur erroris fons, quod fingitur, diversas has vias re ipsa ita esse oppositas et divergentes, ut conjungi nequeant; ne di-

A

cam, eas numquam adeo acute limitatas existere, quales in abstracto proponuntur. Altera enim, quae a principiis divinatis 1) ad singularia descendit, objectorum suorum cognitionem ex experientia hausit; altera eis tantum, quae vere compert, gaudens, per inductionem ad corollaria universalia tendit. Historiam naturalem profitenti haud dubium esse potest, suam disciplinam vi vocis esse historicam omnesque ejus fontes e sedula naturae observatione cautaque interpretatione exsilire. E singularium cognitione omnis vera et fructuosa historia fluit, licet haec via molesta videatur venatoribus, ne dicam helluonibus summatum rerum. Horum dicendi genus testatur praecipuum eorum esse studium, ut fragmentitas quasdam notiones foenerent ideasque raptim exceptas nundinentur. Cum naturae librum, siglis quasi sinicis conscriptum, numquam, nec breve, exhaustire liceat (Auctor enim est Ens infinitum), temere perhibent, accuratori ejus studio tempus tantum perdi idemque nil ad veram humanitatem conducere, ad summum eis, qui objecta in practicum usum convertunt, esse relinquendum. Ad haec refutanda verbum vix perdam; ipsa humanitas extra naturam non existit. Non ii sumus, qui pleniorum singularium cognitionem ab omnibus petamus; tantam vero censemus necessariam, ut ea, quae peritiores de naturae constructione, viribus ceterisque rationibus experti sint, possint capere. At minime spernamus symbolas eorum, qui in verborum et objectorum subtiliori et accuratori notatione circumscribendi studio, (modo illud in nugas et inanes tricas haud abeat), praecipue videntur versari. Tantus enim est ambitus, ut vita humana ad singulas ejus partes disquirendas haud sufficiat; tanta harum vis, ut scientiae fundamenta facile fiugantur. Est

---

1). Rigidiores naturae scrutatores illam ut meram "naturae poësin" spernunt, et quidem jure, si cum observatione committetur; at quis negaret ipsae poësi inesse elementum sublime et divinum; veram multa naturae mysteria persentis, quae nulla experientia comperit.

inter seculi commenta, quod velit omnes aequae ad scientias et civitates gubernandas et reformatas educare. Fidis operariis semper maxime egemus, nec leve est vel spiculam ad aeterni opificis ideas cognoscendas contulisse. Fastigia petentes numquam desint neque, quando necessarii, reformatores. Quemadmodum sub pace oeconomia privata optime viget, sic etiam sub scientiarum minus coruscantibus induitis ipsarum materies maxime saepe crescit. Reformationes rarius rem ipsam, quam proponendi formam tantum respiciunt. Qui ad ipsius scientiae ambitum dilatandum apti, numquam in singularibus ita detineantur, ut ob media, quae tamen ut necessaria colunt, verum finem amittant. Ambigua magis est laus multorum theorematum subtilium, sed Icareis alis evectorum, quae hanc scientiam a vero experientiae tramite seducentia, ipsius tranquillam evolutionem magis retardarunt, quam accelerarunt. Hac ratione e fulgore sumus potius, quam e fumo lumen oritur,

### §. 2.

*Qua ratione natura organica est observanda?*

Jam obiter indicatis, summo studio summaque diligentia per observationum immensam silvam, nec per intuitionis tantum deserta infinita pertendendam esse historiam naturalem, si nomen suum haud denegabit, alia nobis obviam venit controversiarum strues, negligetis variis naturae notionibus, confusisque diversarum corollariis et observandi methodis accumulata. Vix habent linguae et latius patens et vario magis sensu exceptum, quam naturae, nomen. Cum alii, cetera ut taceam, ad totius creationis summam, s. ad omne praesens, a perfecto natum, gravidum futuro, extendunt; alii ad primitivam etymologiam vocis a nascendo, indeque ad corpora organica restringunt. Utique singulæ naturae vires ut plus minus perfectae evolutiones unius primitivæ considerari possunt; maxime tamen cavendum, ne alterius rationes ad alteram l. universam naturam transferamus vel omnes pari modo observandas fingamus. Accedente enim vita, observandi modus plane immuta-

tur. Vitae phaenomena infinito quodam et altiori, quam calculo, subordinant. Vitae observator ex maxima parte passivus erit, et illius evolutiones oculis animoque sequetur; naturae brutae et inorganicae experimentator activus est, ipse sua pericula dirigit et pro libitu variat. Vita existit tautum tranquilla et successiva evolutione; vires chemicae in producto suo quiescent. Vita est victoria virum naturae organicae; reagentibus inorganicis victricibus sequitur mors. Qui igitur viva naturae corpora pariter ac inorganica tractat, ea non ut viva sed ut mortua observat. Beue jam pridem observatum est, animam cultro anatomico haud demonstrari; sic etiam reliquae vitae actiones, quae praecipuae tamen sunt [nec ejus involucri forma, numeri, relativae proportiones e. s. p.], violenta manu haud prensantur. Hac de causa disciplinas experimentales facile dicerem rationalismum naturae, biologicas vero supra-naturalismum, ita nempe, ut naturae vivae non imperetur, nisi parento. Qua differentia in observando praetervisa s. vita et sensibilitate viribus physicis subjectis oritur observandi genus, quod vivae naturae studii fundamentum subvertit ejusque nativum ingenium tollit. Quod cum dico, caendum tamen esse moneo, ne omnem tamen utrarumque nexus et recussum praetervideamus harumque vim externam denegemus. Quis enim neget v. c. planarum faciem ad externa momenta mutari 1); at qui simili ratione, subjecta pro experimentis analogia, singu-

---

1) Hinc etiam differentiae biologicae in maxime singularibus, v. c. in specierum limitatione, magis sunt attendendae, quam vulgo fit, cum in herbariorum cadaveribus, vita extincta, observari nequeunt. Exemplo sint *Iyclus silvestris* et *pratensis*; color manifeste in utraque varius est; notae e capsulae dentibus, foliis etc. satis relativae sunt, sed petala in altera diurna, in altera tantum nocturna diversas species extra dubium ponere videuntur. Sic in difficiili *Potentillarum subacaulium* grege notae primariae latent in ipsorum historia diversa, florum diversa explicatione, peduncularum anthesi peracta mutatione etc.

Iarum plantarum originem explicare student; nimis seducuntur. Quis non videat, externam corporum organicorum formam ad medium cingens, soli indolem e. s. p. esse adaptatam, ut justo longius evidenter progreduntur, qui exinde fingunt, materiem brutam ad chemicas leges tantum produxisse vitam. 2) Quae hoc loco in genere tantum disseruimus, id plenius per exempla, de generatione originaria ceterisque disputaturi, in singulis persequemur. — Inter errores vulgo errat ingenium humanum, raro in recto et vero licet consistere. Felix, cui contigit aliqua saltim idola fori et theatri excutere. Qualia sunt tum arrogantia per inferiores naturae vires explicare ea, quae e vitae ipsius nisu et rationibus ultimo pendent, quum et devota naturae ipsius adoratio et mere passiva, captivo ingenio, objectorum contemplatio, quarum illa historiam naturalem ita mystico quodam involuero obducit, haec omni prorsus vi et decore exuit, ut ingenia magis corrumpat et deprimat, quam excolat et incendat.

Ad hunc locum, ut ambiguas phaenomenorum explicationes, insuper referamus varias loquendi formulas sat tritas, sed pro parte in Historia naturali vulgo haud salis definitas, v. c. *de polaritate* 3), de vegetabilium per miasma origine e. s. p.; pro parte a vera notione dis-

2) Controversias de hac materie, utpote meo sensu extra experientiae et verae inductionis limites, indeque etiam historiae naturalis positas, in hac collectione negligimus. Ingeniosa quidem vidimus pericula, v. c. chemicam Lichenum originem explicatura a Meyeru, sed, meam ut praefiscini dicam sententiam, vita ipsa praestigiis inducitur. Dubia mea proposui in *Lichenologiae Fundamentis* p. Lll. not. 2. Aequo, ni majori forsitan, jure fingeres materiem esse activitatis vitae residuum.

3) Vera in Historia Naturali *polaritatis* notio, quam inter tot de illa sermones tenere debemus, ea est, ut loco opposito oppositum, intensione aequali, fiat, ut si eodem loco ultrumque fieret, nil efficeretur, quare etiam combinatione omnis tollitur diversitas. Saepe confunditur cum *antagonis-*

tortas, v. c. de *electricitate et affinitate chemica*, quasi haec per se existarent, cum merae sunt naturae vires, ab objectis suis nullibi segregatae. Explicatio illa nulla est, quae non rite et plene percipitur. Hinc nil juvant qualitates occultae, nil demonstrant speciosae verborum ambages, nam quod in expositione indefinitum et vagum est, id in constructione fallax et infidum manet.

### §. 3.

*Quo ordine in naturae studio progrediamur?*

Utrum ab insimis, an a summis in Historia naturali progrediamur est quaestio, quae in abstracto proposita aegre interpretatur, at in singularibus haud levis momenti, ut legitimus studiorum ordo teneatur. Attendum est ad objectorum indolem, ad expositionis finem. Ea indies inter Botanicos 1) latius serpit opinio, tam in observando, quam in disponendo maxime naturalem et facile unicum genuinum esse ordinem, qui *a plantis simplicissimis*, ut ajunt, ad magis *compositas* *adscendit*. Nec dubito fore varios, qui aegre ferant, ut in rebus ambiguis fieri solet, in dubium vocari rem, quae ipsis rata et simplicitate sua manifesta videtur. Omnis vero antiquitas contrariam viam secuta est et hujus de principiis scientiae judicia, salva erga praesentis aevi magis dilatata in experientiam fide, haud spernenda sunt. Rajum ceterosque laudantes ordinem, quem merito inversum dicere nobis videmur, jam refutavit Linnaeus. "A perfectissimis, inquit, ad simpliciora progredi est series naturalissinia. Methodici summi metho-

---

mo i. e., quando loco opposito, nexu necessario, idem pari gradu sit, et *anthithesi*, quando locus oppositus opposito decrescente increscit. Cfr. *Link Phil. Bot.* p. 19.

1) Zoologi contrariam vulgo sequuntur viam. Summus *Decandolle* in primis suis scriptis v. c. Fl. Franc. ab insimis; in recentiori Systemate vero universali a summis ordinem dicit.

do mathematica in scientia naturali a simplicioribus ad composita adscendunt adeoque incepere ab Algis, Muscis, Fungis etc. — — — sed naturalis instinctus docet posse primum proxima, dein minutissima". Hanc auctoritatem, primaria in nuce colligentem, genio hodierno mihi olim opponenti satis videbatur citasse; cum multi autem illud effatum jam obsoletum et explosum 2) adhuc censeant, plures addere lubet rationes, cur negemus "a simplicibus ad composita" seriem esse pertendam. — *Vita* per se ubique integra, *et componi et dividendi nequit*; singulum corpus vivum, ex organis compositum, simplici existit principio, quod in se involvit "αρχὴ κανόνεως καὶ στοέως". Corpora inorganica in simplicia et composita distribui possint et ad diversos *compositionis* gradus ordinari debent; non vero corpora organica, quae *evolutionis* gradu inter se discrepant — et in novissimo statu, in primitiva elementa dissoluta, haud organica sunt. Hac ratione ipsa thesis in absurdum abire videtur; at in verbis faciles simus. De plantis enim simplicibus et magis compositis disserentes respiciunt organa ipsa, tam interna, quam externa; ex utrorumque numero, evidenter e. s. p. plantas simplices et compositas dicunt. Si ad typum quandam normalem haud respiaciatur, multa in his arbitraria sunt; partium luxuries non ubique est perfectior status neque earum varietas; organa saepe non actu, sed potentia tantum existere videntur. 3) Ita vero proposita thesi, ut a minus ad magis evoluta progredi praestaret. insignem veritatis speciem prae se fert. Naturam enim ipsam hoc ordine tantum fetus suos enixam esse, inveteratum est judicium, saepe citatum quasi hanc viam etiam studiorum esse naturalissimam demonstraret. At quam lubricum et anceps sit

2) Cfr. v. c. *Bischoff Lehrbuch der Botanik.*

3) Lichenum systema vegetativum extus omnino uniforme; sed includit rudimenta eorum organorum, quibus perfectiores plantae ornantur. Ex altera parte in plantis typice vascularibus, foliosis, etc. vasa, folia etc. deficiunt. Quae primaria sint, magis *ingenii*, quam *oculorum acie* indagandum.

illud praejudicium laudatum, aliis locis, hoc non repetendis, satis superque demonstrasse nobis videmur. Prima rerum stamina nulla experienta comperit, nec forsitan caperet; attendentes vero ad momenta praesentia facile vidimus, imperfectiora aequre frequenter esse secundaria. 4) Cum illo argūmento collidit alterum, eandem nempe esse singulae plantae, totius orbis vegetabilis ectypae, evolutionis seriem; sed etiam haec in alternatione expansionis et contractionis posita est 5); ab infimo ad culmen nacta ad statum primarium revertitur. Exinde sequitur, infima ordinem et aperire et claudere, vel quod idem est omnem istam argumentationem ad rem illustrandam nil conducere. Scientia enim statum perfectissimum l. typicum maxime respicit. Quaestiones, quae rem solae persolvunt, sunt vel *theoreticae*, v. e. utrum a superiori notione an ab inferiori justius construatur disciplina, vel *practicae*, utrum interpretatio a rite explicatis obscuriorum, an versa vice, sit facilior certiorque. Quid ad has respondeatur, nulla eget interpretatione. — Addere tantum juvabit, infima tam animalia, quam vegetabilia ita esse obscura et amphibola, ut sine perfectiorum analogia numquam intelligantur; in his omnibus organa eorumque functiones adeo esse obscura, ut a nemine sine archetyporum cognitione explicari possint. Qua de causa sine haesitatione statuo eos ipsos, qui viam adscendentem laudant, oppositam in observando tamen esse secutos. Ceterum ea, quae infima censem vegetabilia, v. c. *Ustilago*, *Lepraria*, *Protococcus*, *Conserveae* simplicissimae etc., haud sunt autonoma, sed aliorum elementa, saepe degenerata. Qui ab infimis progredi volunt, definito principio semper careant. Quousque "in mundo invisibili" microscopiorum ope pervenimus, vitae

---

4) *Syst. Orb. veg.* p. 10—16. *Lichenol. Fundam.* p. XLVIII—LII.

5) Cfr. *Goethe Versuch die Metamorphose d. Pflanzen zu erklären*. Plenior est explicatio theoriae Linnaeanae de prolepsi plantarum, ab auctore subtilissimum inventum dictae, sed ab ipsis sectatoribus diu prorsus neglectae,

polum aequē difficile ac terrae attingimus. Insimorum limites, vacillans sane studiorum basis, quotannis dilatantur et turbantur, sed ab antiquissimis inde temporibus, quod sit rerum cretarum fastigium, homo rationalis persensit.

### §. 4.

*Quid de segregato singularium Historiae naturalis partium studio censendum est?*

Historia naturalis jam est campus tam vastus et immensus, ut, si quis omnes ejus partes se cmetiri posse putaverit, guttas oceani se numerare posse putabit. 1)

1) Rerum memorabilium vel saltuum ipsorum objectorum cognitionem per saeculorum studia jam paene esse exhaustam, minus peritus facile singit. Vera ratio tamen est inventorum et observationum novam copiam quotannis adhuc magis magisque accumulari et augeri, ut nostro aevo historiae naturalis partium ambitus multoties latior sit quam v. c. Liungæano, omnis. Rapido illo incremento et, quae inde sequitur, scientiae varietate, utrum doleamus magis, an gaudeamus nec satis scio; nec, si scire credam, dicere ausim. Eisdem subesse saepe novitatis studium laud diffidendum est; at qui et novitatis et antiquitatis studium juste aestumat, nimium utriusque evitat, neutrius asseclas et sectatores cogere studet, sed bona et utilia undique seligit. Ipsa autem sua mobilitate omnis historia vivam se testatur, continue crescendo tantum perennat, novitatis suavitate novos sibi conciliat cultores, qui non in verba Magistri jurant, sed mente animoque percipiunt, examinant, corrugant aut eisdem superstruunt. Institutionem igitur historiae naturalis exinde dicere eo magis ingenuam, quo magis ad liberam ac religiosam naturae contemplationem dicit; eo magis liberalem, quo minus notiones abstractas ut opiniones praecjudicatas imponit; eo magis utilem, quo magis universalem scientiae genium respicit. Qui totus in partibus singularibus detinetur, numquam comnitonum studia in partes maxime necessarias dirigere potest.

Ut igitur peregrinator omnes terrae regiones ne percur-  
re quidem poterit, sic multo minus naturae observa-  
tor ubique terrarum vigentia et animantia eadem diligen-  
tia poterit perlustrare, sed certa sibi quisque seliget lo-  
ca, quae maxime colat et in quibus sedem quasi figat.  
Necesse tamen est praecipua ad disciplinam suam spec-  
tantia prius attente percursa propriisque oculis lustrata  
habere, ut ejus ingenium et universalem nexum per-  
spiciat, ut ordinem rerum memorabilium uno quasi con-  
spectu possit intueri atque totum campum ita diligentia  
et cogitatione comprehendat, ut nullam ejus partem con-  
temnere videatur. Haud satis est, si sciat, quantum in  
hac vel illa parte exstructum sit et quantum adhuc re-  
stet, sed videat simul necesse est, qua ratione reliquae  
et affines partes sint expositae; videat, quae in com-  
munem scientiae summam quadrent, ne "statum in sta-  
tu" (excusetur expressio male latina) condat; quae nisi  
viderit, nil perennans ad opus perficiendum poterit con-  
ferre idque inscius et temerarius magis obfuscabit,  
quam illustrabit. E partis segregatae studio nulla na-  
scuntur corollaria fida; at communis ejus error est ex  
angusto privae experientiae ambitu ad latius extensa sal-  
tu adseendere. Inde orta sunt tot principia divergentia,  
aut potius centrifuga, licet robur scientiae in singula-  
rum partium convergenti et centripeto studio consistat.  
Hoc est quod studium monographicum et ipsius scientiae  
anamorphosin l. luxuriem diximus, probe discernentes ta-  
men monographias, non tironum, sed magistrorum, ut rite  
perspectus scientiae hiatus tollatur, elaboratas. Tempor-  
is vero genius, in dissolvendo occupatus, neglectis di-  
versis principiis, partes singulares, etiam finibus angu-  
stissimis limitatas, ut autonomas disciplinas tractatas pa-  
riter saepe extollit. Haud itaque contentus antiquiori  
in Zoologiam et Botanicen distinctione, quae, licet ob  
singulae ambitum multasque rationes inversas prorsus  
necessaria sit, haud ita excipienda, ut altera alterius  
cognitione earere possit, singulam harum secundum clas-  
ses et familias, immo genera, in novas prorsus discipli-  
nas abire posse fingit. Iude factum est, ut variis locis  
Botanicos et Zoologos frustra quaeras, sed Bryologos,

Lichenologos, Rhodologos, vel Ornithologos, Coleopterologos, etc., qui reliquam scientiam parum curant, tantum invenies. 2) Singuli summo studio et labore nituntur, ut suam particulam reddant diffusam, ne dicam plerisque aditu difficilem, singularem eidem vindicent vim ipsiusque videantur Autocratores; at verus scientiae progressus est, ut illa magis fundo quam ambitu crescat, ut singularium partium studium omnium nexu aditu faciliter reddatur et hoc modo plures habeat testes, ne in unius verba juremus. Monographicum studium laudandum quidem, quatenus ad particulae suae expositionem apparatum necessarium conductit, sed a superiori principio ipsa constructio pendet; nescit saepe quid genus, immo quid species. 3) At si quis Systematogiam, Ana-

2) Multi sane Botanici, plantarum Vascularium tantum studiosi, fingunt se Cellularium proprio studio carere posse et de omni re herbaria tamen judicia ferre. Qualia vero? Fungos et Orobancheos v. c. ut familias pares, s. pares evolutionis gradus, proponunt! Ut sexcenta ejusdem indolis reticeamus.

3) De ipsis his rebus monographorum iudicium saepe levioris est momenti, licet contrarium videatur, cum in his praecipue versentur. At qui genus monographice tractant, ejus limites, quounque fieri possit, v. c. *Potentillae* dilatant; qui familiam, ut quam plurima genera distinguantur, student. Ad duo extrema, nunc contrahendo, v. c. *Biria* in Ranunculac., *Wallroth* in Rosis, Cladonis etc., nunc separando v. c. *Reichenbach* inter Aconita, *Weih* inter Rubos e. s. p. in speciebus limitandis vulgo tendunt monographi. Controversias de specierum limitatione infra exponere plenius, licet componere mallemus, cum vulgaris per convicia [“confusionarii, specierum fabricatores”] oppositas vias refutandi modus melius sapientibus tantum spernendus videtur et laxitate sua nil demonstrat. Nam et in contrahendo et in distinguendo aequa facilis error. Id tantum ad hunc locum addendum nec familiae, nec generis neque speciei notiones intra angustos limites, ut suo loco exemplis probabimus, plene dilucescere.

tomiam, Physiologiam ceterasue Historiae naturalis partes universales colebat prorsus separatas, quod per se contradictionem involvit, exempla tamen non desunt, majus inde scientia caperet detrimentum, quam emolumentum. — His expositis comprobasse nobis videmur effatum *Lichenogr. Europ. p. LXX*, quod asperum nimis quibusdam apparuit: Singularium cognitionem studio monographicum eximie saepe excrevisse haud diffitendum est, sed stolonibus etiam resecandis luxuriavit, quare vulgo non nisi retracta in commune scientiarum caput adsumenda est; raro fundamentis pariter firmata ac ambitu adacta fuit. Proximis familiis valedicendo, egit potius reprimens in universalem disciplinarum nexum et tractandi modum; singula non in plura latera, nec pluribus conjunctim expolitis. Auctor, qui unico puncto oculos infigit, non potest non multa obliquis intueri hinc quis; qui cunctis viribus in unius partis reformationem tantum nititur, facile ad nimia proferenda, nimia subvertenda, ut attentionem excitet, deducitur." Cum sibi ipsi videtur particulae suae Autocrator, aliorum auctoritatem et totius scientiae historicam evolutionem facile negligit. Nec mirerer, si aliorum studiorum necessius, indeqne illa simul spernens, suorum nimiam vim tribueret, cum tractet scientiam ut res mercenarii ad officinas, universalem nexus haud perspicientes. At difficile inter duo extrema viam, quae ad verum dicit, invenire. Sic aequi caveamus, ne singularium accuratius studium negligamus, nec errantes ita summitates rerum venemur, ut nullo loco consistere et habitare dicimus possimus. Oppositae haec rationes facile componuntur. Quo plenus scientiae ambitum percepimus, eo magis fructuosum singularium studium. Quo magis singularium partium cognitione nititur, eo clarior certiorque omnis scientia. Hinc nec generalia a singularibus, nec singularia ab universalibus, quantum fieri licet, separantur, ut se invicem eo firmius suffulcent. His non junctis, omnis systematis constructio vana et irrita.

## §. 5.

*Utrum systema artificiale, an s. d. naturale sit praeferendum?*

Paucis hanc rem absolvere licet, quando contentiones de constructione in medio relinquimus. Ipsae enim notiones inter omnes Historiae naturalis cultores sunt notae et receptae; et inter peritiores et melius sapientes de alterius praecellente vi et dignitate jam quidem finitae sunt omnes controversiae. Graviora facile moverem dubia de ipsarum stricta limitatione et accurata denominatione. Primo enim natura strictas et acutas nostras systematicas sectiones raro agnoscit; integra enim est, quam cum excipere tamen non valeamus, in nostrum usum laceramus iterumque qualitercumque resarcimus. Porro omne sistema naturae quoad materiem *naturale*, quoad formam *artificiale* necesse sit. Sed non nomina, sed res ipsas, quales vulgo receptae, respiciamus. In Zoologia dispositio artificialis ut universale principium numquam agnita fuit. Nam si quis animalia *ex uno organo v. c. pedibus* in Apoda, Monopoda, Dipoda, Tetrapoda, Hexapoda e. s. p. disponere mallet, risum tantum moveret. Plurimae enim, praecipue superiores, Animalium sectiones ita externa facie jam discrepant, ut a vulgo etiam dignoscantur. Inter animalia inferiora vero sub summa universalii partium conformatione maxima in singularibus regnat varietas, ut inter haec jam ars subveniat. Inter plantas, quarum plurimae rationes regni animalis oppositae videntur, inferiores greges acutius a natura limitatae, quam superiores. In ipso centro singulae formae tam conformes, tam configuae primo obtutu videntur, ut variis frustraneis periculis defaligati methodum artificiale multi, pro tempore saltim, praetulerunt; idque caute factum censemus, nam ubi affinitas naturalis haud manifeste indicata est, melius videatur definitum quoddam amplecti, quam in tenebris errando accidentale et vagum pro essentiali, et sic se aliosque salere. Nec umquam, nostra e sententia, omnes illae difficultates plene tollentur. Fingunt quidem novis inventis loca obscura illucescere; his vero reticulatus omnium

nexus magis decussatur et intricatur. Quo major enim fit, quo magis concentratur ipsa sectio, eo magis artificialis intra ipsam dispositio. [Exempla sint inter plantas Synantherae, Cruciferae, Umbellatae.] Ceterum tiro, qui omnia ex usu addiscat, infinitam varietatem sine clavi artificiali uno conspectu numquam potest intueri; at caveat simul ne nubem illam pro Junone amplectatur. Utramque igitur methodum, diversis scopis adaptatam, necessariam censemus. Videre quidem licet hinc inde adhuc aspera et temeraria judicia de systemate sexuali, sub cuius auspiciis tamen res herbaria per longam annorum seriem laete viguit; perennat tamen illud summi ingenii monumentum perennabitque forsitan in praxi, quamdiu necessarium est plantas prius agnoscere, quam eas cognoscere licet. Linnaeus, auctor systematis inter omnia artificialia usitatissimi, naturale 1) non minus coluit. Ipsius verba hoc loco transcribere liceat: "Primum et ultimum in parte systematica botanices quaesitum est methodus naturalis; haec adeo a Botanicis minus doctis vili habita, a sapientioribus semper tanti aestimata, adhuc licet detecta nondum. Diu et ego circa methodum naturalem inveniendam laboravi, bene multa quae adderem obtinui, perficere non potui, continuaturus dum vixero; interim quae novi, proponem; qui paucas, quae restant, bene absolvit plantas erit, mihi magnus Apollo". 2) [At hoc unius non erat opus; in hac re summi dein per seculum sudarunt Botanici, quorum conjuncto studio eo praefiscini perventum est, ut

1) Systemata artificialia nomina gerunt ex suo Auctore, quia hic leges naturae imponit; non vero methodi naturales, quia in his naturae ipsius leges sequi debemus. Vera igitur in his sunt naturae, errores tantum cuique Auctori privae, Linnaeus vero, qui primus clare proposuit utriusque differentias, maxima augmenta ad methodum naturalem conduxit; mire vero, forsitan nimia modestia, neglexerunt ejus proximi sectatores.

2) *Linn. Class. Plant. p. 484.*

jam minor sit dissensus de generum familiis 3), quam, de genere singularium specierum; Characteres familiarum generum vulgo firmiores sunt.] "Emendent, augent, pergit Linnaeus, hanc methodum qui possunt; desistant qui impares sunt; qui valent Botanici sunt eximii 4). Methodi naturalis fragmenta studiose inquirenda sunt. Primum et ultimum hoc in Botanicis desideratum est. Summorum Botanicorum hodiernus labor in his sudat et sudare decet". 5) Nec melius utriusque viae fines diversae exprimi posse videntur, quam Linnaeano: "Ordines naturales valent de natura plantarum — artificiales tantum in diagnosi plantarum". 6) Plura addi possent loca cum his parallela; sed vereor, ne Linnaeus methodo naturali nimia tribuisse saepe videatur. "Perpetuum, ait enim, est quod methodus artificialis sit tantum naturalis succedanea, nec possit non cedere naturali". 7) Methodo naturali plenius pertentata fere omnes jam concedunt, clavem artificiale simul paene esse necessarium. De ipsa igitur re post De Candolleum 8) vix verbum amplius perdam; jam error est de alterius utrius exclusivo pretio, cum juxta se invicem optime persistunt, disceptare. Id tantum addere liceat utriusque

3) Dissensus praecipuus est de singularum sectionum naturalium dignitate, utrum familiae an sectiones sint dicendae. Sed haec, quae ad sequentes controversias magis pertinent, si ad empiriam tantum respicias, est levioris momenti. Bene ceterum Reichenbach: "Familiarum naturalium dilaceratio jam facta est occupatio trita; congregatio naturalis et consecutio naturalis magistrorum desiderium».

4) *Linn. l. c. p. 487.*

5) *Linn. Phil. Bot. p. 31.*

6) *Linn. Gener. Plant. praef.*

7) *Linn. Class. Plant. praef.*

8) Cfr. *DeCandolle Theorie Element.*; quae omnes huc spectantes rationes plene exposuit.

studium necesse conjangendum. Systema enim artificiale, index quasi realis, tradit tantum rerum nomina; hoc invento tiro facile singit objecti studium esse absolutum, cum methodus naturalis docet *verum* tum primum incipere. Haud pauci igitur, sterili illius studio defatigati, duo per Historiam naturalem tantum serpere mala temere perhibent, sistema nempe arbitrarium et nomenclaturam infinitam, quibus discendis tempus consumitur. Aliter vero judicarent, nisi ipsi *extra limen* scientiae acquievisserent. At haec media, metam adspirantibus necessaria, per se non tanta mihi quidem videntur mala, quanta vulgo haberi solent, modo non ob media finem neglexeris. Qui accuratius et prudentius velit judicare, facile videbit, eadem chronologiae et factis in historia universalis respondere illisque etiam boni aliquid admixtum esse. Sic ope Systematis primum et praecipue ordo quidam adhuc fragmentitiis studiis adhinetur, quo futura et altiora sublevantur, ordinantur, quid, quod ad ipsam humanitatem conformantur. Hanc, nomenclaturam dico, non memoriam puerilem tantum excercere, sed judicium etiam adolescentis excolere (si discens, ut decet, objecta ipse determinare cogitur, nec e magistri ore tantum perciperit), sed maxime etiam impedire crediderim, ne naturae studium practicam deserat viam. 9) At in sequenti continemus, quae nunc in media serie abrumpamus.

---

9) Facile concedimus Historiam naturalem praecipue ut humanitatis medium esse aestumandam — et nescimus, sane an vitae communi ulla re magis consulatur, quam vera humanitate; dissentimus tamen ab illa sententia, ex qua eadem disciplinis practicis servae officio perfangi non decet. Cum inter has et disciplinas philosophicas, stricte sic dictas, multae orientant necesse est contentiones, Historiam naturalem exceptimus ut rationem medianam, pacificantem, expiantem, quae utramque viam amoris in naturam vinculo reconciliat.